

20/09/2000

Pertemuan budayawan jadi acara tetap

KERAJAAN Sabah menyokong penuh agar pertemuan Budayawan Serantau BIMP-EAGA menjadi satu pertemuan tetap dalam kalender pergerakan kebudayaan di negara ini, kata Menteri di Jabatan Ketua Menteri, Datuk Musa Aman.

Ketika berucap di majlis penutup pertemuan yang dihadiri lebih 100 peserta itu, beliau percaya Sabah dapat memainkan tanggungjawab dalam pertemuan itu memandangkan kedudukan negeri itu yang strategik.

Konsep penubuhan BIMP-EAGA yang diwujudkan sebagai wadah perdagangan bebas yang lebih kompetitif, dapat dimanfaatkan budayawan, seniman, sasterawan dan penulis untuk membina kesatuan dan persatuan budayawan serantau.

"Kemajuan ekonomi hanya bermanfaat jika dapat mewujudkan kesejahteraan yang murni di kalangan umat manusia. Program pembinaan nilai kemanusiaan, perlu diberi keutamaan melebihi pembangunan sektor sosial lain," kata Musa.

Beliau meegaskan, pertemuan seumpama ini sudah pasti akan mewujudkan satu persekitaran dan skop pengkaryaan yang lebih luas dan beranekaragam.

Ini adalah detik awal untuk menerokai dan menghayati kehidupan masyarakat di rantau ini.

Sebelum ini, kehidupan masyarakat di rantau ini terasing dan terpisah jauh, walaupun semuanya dari rumpun yang satu.

Kesemua ini adalah kesan penjajahan Barat ke atas negara BIMP-EAGA yang begitu lama.

Rakyat di rantau ini dijajah dan dipaksa menerima budaya asing menerusi sistem pemerintahan yang cukup pedih.

Penjajah memecahkan hubungan budaya dan tradisi masyarakat dan merampas kekayaan negara yang dijajah untuk kesenangan mereka.

Kata Musa, "kebangkitan seniman, budayawan dan pejuang bahasa berjaya menyingkir penjajah tetapi kesan yang ditinggalkan tidak mudah untuk dihapus".

Apa yang diwarisi sebagai pribumi hasil penjajahan yang panjang itu ialah kemunduran dan keterbelakangan. Sampai saat ini, kita terpaksa bersaing hebat dengan waktu dan keadaan untuk merebut tempat dan hak sebagai pribumi yang menjadi teras kekuatan bangsa.

Hal ini tentunya tidak boleh dicapai hanya dengan pembangunan ekonomi semata-mata.

Dasar Ekonomi Baru sudah menjadi pemangkin dan platform transformasi pemikiran dan budaya tetapi rakyat tempatan masih terkebelakang berbanding bukan pribumi.

Musa menegaskan, rumpun Melayu seolah-olah terpinggir dari semua aspek kemajuan.

Mujurlah Perdana Menteri, Datuk Seri Dr Mahathir Mohamad berjaya mencetuskan gagasan ekonomi dan politik besar.

Dari pencetusan gagasan yang agung itulah, kita tampil bersaing dalam persada dunia. Meneroka segala potensi untuk bersaing di peringkat antarabangsa.

"Kita sekarang berada dalam peralihan untuk merebut kedudukan ekonomi, bagi memastikan ketuanan Melayu tidak tergugat," katanya.

(END)